

Qeqqata Kommuni Nunaqarfimmi aqutsisut suleriaasissaat

Nunaqarfimmi aqutsisut ataatsimiittarneri

§ 1. Nunaqarfimmi aqutsisut ataatsimiinneri tamanut ammasuupput. Suliassalli ataasiakkaat matoqqasumik suliarineqassasut Nunaqarfimmi aqutsisut aalajangersinnaallugu. Tamatumani suliassat aalajangiiffigineqarnissaminni inunnut ataasiakkaanut tunngasuusut, assersuutigalugu isumaginninnermi pisartagaqartitsinerit, sulisussanik atorfinitsinerit imaluunniit suliassat allat nipangiussisimasussaataitanermik malittarisassani ilaatinneqartut eqqarsaatigalugit.

Imm. 2. Suliassalli matoqqasumik suliarineqarnissaannik apeqqut matoqqasumik oqaluuserineqareersimassaaq, tamanna Nunaqarfimmi aqutsisunit aqutsisulluunniit siulittaasuannit aalajangerneqarpat.

Imm. 3. Suliassat matoqqasumik oqaluuserineqartussat sapinngisamik oqaluuserisassani kingullingorlugit inissinneqarsimassapput.

Imm. 4. Kalaallit Nunaanni pinerluttulerinermut inatsimmi aalajangersakkat naapertorlugit, suliani matoqqasumik suliarineqartuni nipangiussisimasussaataitaneq tamanut atuuppoq.

Imm. 5. Nunaqarfimmi aqutsisut tamanut ammasumik ataatsimiinneranni kinaluunniit pissuserisaarluni najuussinnaatitaavoq. Ataatsimiinnermi tusarnaartutut najuuttoq akornusersuippat, nunaqarfimmi aqutsisut siulittaasuata pineqartoq imaluunniit pisariaqarpat tusarnaariat tamaasa ataatsimiiffimmit qimagutitissinnaavai.

§ 2. Ilaasortaq nunaqarfimmi aqutsisut ataatsimiinneranni najuussinnaangikkuni, nunaqarfimmi aqutsisut siulittaasuata ataatsimiinnissaq sioqqullugu ilisimatissavaa. Aalajangersakkanut imaqarniliani ataatsimiinnerit tamaasa ilaasortat kikkut najuussimannginnersut nalunaarsorneqartassapput.

Imm. 2. Nunaqarfimmi aqutsisut ataatsimiinnissaanni pissutissaqavilluni ilaasortaq ataatsimeeqataasinnaajunnaarpat sinnisussaq sinnisussat allattorsimaffiini tulleriarnerit mallillugit aggersarneqartassaaq.

Ullormut oqaluuserisassat allassimaffiata nassiunneqarnera, suliassallu saqqummiunneqartarnerat.

§ 3. Ilequusumik ataatsimiinnissaq kingusinnerpaamik ulluinnarnik sisamanik sioqqullugu Nunaqarfimmi aqutsisunut ilaasortat ataatsimiinnermi oqaluuserisassat pillugit paasissutissanik pisariaqartunik ilisimatinneqarnissaat, Nunaqarfimmi aqutsisut siulittaasuata isumagissavaa.

Imm. 2. Suliassaq ullormut oqaluuserisassanut ilanngunneqarsimappat - suliarmullu tunngatillugu nalilersuinissamut paasissutissat pisariaqartinneqartut ilaasortanut sioqqutsisumik nassiunneqareersimanngippata - Nunaqarfimmi siulersuisut allaffianni takuneqarsinnaanngorlugit inissinneqassapput. Peqatigitillugu suliassat allattorsimaffiat saqqummiunneqarsimassaaq.

Imm. 3. Nunaqarfimmi aqutsisut siulittaasuata immikkut ittumik ataatsimiigiaqqusinermut atatillugu sapinngisamik ataatsimiinnermi suliassat oqaluuserineqartussat pillugit ilisimatitsisassaaq.

Aalajangiisinnaassuseqarneq, ataatsimiinnermi aqutsineq suliallu saqqummiunneqartarnerat

§ 4. Nunaqarfimmi aqutsisut ikinnerpaamik ilaasortat affaat najuuppata aalajangiisinnaassuseqarput.

Imm. 2. Nunaqarfimmi aqutsisut siulittaasuata ataatsimiinnerit aquttassavai. Ataatsimiinnerit aquneqarnerini toqqissimasumillu ingerlanneqarnissaannik apeqquusiinerit aalajangiiffigisassavai. Taamatuttaaq suliani taasissuteqassatillugu, qanoq isikkuliinissaq aalajangiiffigisassallugu.

§ 5. Ilaasortaq kinaluunniit ataatsimiinnerup aallartinnerani oqaluuserisassat pillugit oqaaseqarumasinnaavoq, matumani oqaluuserisassat matoqqasumik oqaluuserisassaniit ammasumik oqaluuserisassanut illuanullu nuunneqartariaqarnersut pillugit apeqqutit ilanngullugit.

Ilaasortat ataatsimiinnermi taasinnermilu peqataanerat

§ 6. Nunaqarfimmi aqutsisunut ilaasortap soqutiginninnerata suliami peqataasinnaaneranut qanoq attuumassuteqartiginersoq, tassa pineqartoq suliap ataatsimiititaliami suliarineqarnerani taasissutaa-neranilu peqataasinnaanginneranik kinguneqassanersoq, aalajangissava. Taamaattoqarpat pineqartoq suliamik saqqummiussinnermi, suliarineqarnerani taasissutigineqarneranilu ini qimattariaqassavaa.

Imm. 2. Ilaasortap peqataasinnaanerminut atatillugu nalornisooruteqaruni tamatuminnga nunaqarfimmi aqutsisut ilisimatissavaa.

Imm. 3. Nunaqarfimmi aqutsisut allaffianni allaffissornikkut suliaqartoq Nunaqarfimmi aqutsisunut ilaasortaasinnaangillaq.

Imm. 4. Nunaqarfimmi aqutsisunut ilaasortap kialuunniit oqaluuserisap aalajangiiffigineqarnissaa unitsissinnaavaa, suliaasaq kommunalbestyrelsimut imaluunniit kommunimi ataatsimiititaliamut suliaassanngortinneqassasoq kissaatigigini nalunaaruteqarnermigut, tassa taakkua sinnerlugit Nunaqarfimmi aqutsisut aalajangiisussaaffigisassaraluanni.

§ 7. Ilaasortat ataatsimiinnermi najuunnermikkut taamaallaat Nunaqarfimmi aqutsisut ataatsimiinneranni aalajangeeqataasinnaapput imaluunniit attaveqaatit atorlugit ataatsimiinnermut peqataagaanni.

§ 8. Nunaqarfimmi aqutsisut aalajangersagaat allattaavinnut ataatsimiinnermi Nunaqarfimmi aqutsisut siulittaasuannit imaluunniit siulersuisut allattaannit allanneqartassapput.

Imm. 2. Ilaasortap allatut isumaqarnini naatsumik allatsissinnaavaa.

Imm. 3. Aalajangiinernik allattaavik ilaasortanit ataatsimiinnermi peqataasimasunit tamanit ataatsimiinnerup naannginnerani atsiorneqartassaaq. Ilaasortat namminneq taasinnermik innersuussutigalugu allatigulluunniit patsissarsiorlutik aalajangersakkanut atsiorumangissinnaangillat.

Imm. 4. Ataatsimiinnerup naammassinerata kinguninngua Nunaqarfimmi aqutsisut siulittaasuata ammasumik matoqqasumillu ataatsimiinnermit imaqarniliap assilineqarnera borgmesterimut nas-siutissavaa.

§ 9. Ilaasortaq kinaluunniit nunaqarfimmi aqutsisut siulittaasuata suleriaatsit qanoq paasineqarnis-
saat pillugu aalajangiineranik ataqqinnittussaavoq, apeqqusiinerli kommunalbestyrelsip tullianik
ataatsimiinnissaanut ingerlateqqinneqarsinnaalluni.

§ 10. Suleriaasissat uku atuutilerput septembarip 1-ani 2009-mi.

Imm. 2. Suleriaasissanik allannguuteqartitsinerit tapiliussaqaqarnerilluunniit kommunalbestyrelsip ileq-
quusumik ataatsimiinnerini marlunni oqaluuserineqassapput, taamatullu aatsaat pisinnaallutik Nuna-
qarfimmi aqutsisunut tusarniaatigineqareerunik.

Taamaalillugit kommunalbestyrelsip ataatsimiinnerani aggustip 25-ni 2009-mi akuersissutigineqarput.


Hermann Berthelsen
Borgmesteri

/


Paneeraq Olsen
Kommunimi pisortaaneq